

皇朝經世文續編

皇朝經世文續編卷四十九目錄

戶政二十六 錢幣下

籌議銀錢出入陝省礙難改易疏

陸見恭紀

平定州專用鐵錢流弊議

銀幣論一

銀幣論二

用銀利弊論

請 派大臣查辦疏

請將年終應解物料變通辦理疏

請將晉省例解綢絹紙張折價解部片

奏陳整頓滇省銅政事宜疏

請變通鼓鑄疏

請開爐鑄錢疏

閩省試鑄制錢改由機器局籌辦疏

林則徐

吳廷棟

黃輔辰

馬敬之

馬敬之

姚文枬

張楷

張之洞

張之洞

岑毓英

張之洞

楊昌濬

楊昌濬

皇朝經世文續編卷四十九

上海葛士寧子源輯

戶政二十六 錢幣下

籌議銀錢出納陝省礙難改易疏

林則徐

竊照前准部咨奉 上諭穆彰阿等奏遵旨會議御史劉良駒條奏銀錢畫一章程一摺銀錢並重本係制用常經果能隨時酌覈不使輕重相懸裕國便民兩有裨益未可輒稱窒礙不思設法變通著該督撫等各就地方情形詳細體察悉心妥議具奏務使法立可以推行不致滋弊毋得任聽屬員巧爲推諉稍存畏難苟安之見僅以一奏塞責欽此又軍機大臣會同戶部議覆內閣侍讀學士朱嶠條奏貴錢濟銀一摺奉 旨依議欽此並抄錄各原奏咨行到陝當經前撫臣轉飭司道暨各府州酌覈籌議臣到任後復經諄飭細加體察設法變通不許畏難推諉去後茲據司道彙覈屬稟會議具詳前來臣思銀錢相輔而行利散於民而權操自上果能廣用錢之路自足持銀價之平惟變通本以濟時而制宜首須因地查部議章程四條本以陝西列入陸路六省之內固已知其非比東南各省一革可杭而仍議令查明有無內河水路原冀一處能通舟楫卽於一處先令試行無如陝省七府五直隸州所屬九十一廳州縣之內錯處於南北兩山者計已五十九處重巒疊嶂車轍尙不能通此外三十二處雖屬平原之地亦無內河水路可達省垣是以行旅往來非車卽馱並有馱載亦不能通之處則須雇夫背負脚費愈繁此費若出諸官則恐滋虧空之端若取諸民又恐增派累之弊是陸路之難以運錢實係限於地勢似不能勉強而行也且陝省銀錢市價貴落無常有時竟與別省迥異如本年七月內臣甫到西安省城每紋銀一兩可換制錢一千八百餘文迨至九月間每兩僅換錢一千二三百文

不等較前兩月頓減錢五百餘文之多衆人皆以爲詭異訪詢其故則僉稱歲歉糧貴之時銀價必然跌落其理亦不可解如果此後銀皆落價似亦相宜然又忽低忽昂不能豫料且當陝省銀賤之際鄰省銀價仍昂而未聞有市僧販錢來陝買銀以圖獲利者可見陸路運費太大不能取贏若以市僧所不能爲者責令有司爲之其勢自更不易查內閣侍讀學士朱轡原奏請將各屬銀錢視省垣時價爲準今以陝省觀之卽有難以作準者如省城現在銀賤而各屬之銀偏貴則領錢而回者不能與該處銀價相敵州縣不甘賠累卽難強以遵行且缺分衝僻不同錢糧多寡亦異有此屬之所解而爲彼屬之所領者領錢之人非卽解錢之人稍有參差遂滋爭執似亦非上司所能強制若論常年稅課原可銀錢並收但查陝省額徵商筏稅以及地畜牙常鹽茶磨鐵各課每年共銀六萬八千五百餘兩內除鹽課項下支給西安將軍養廉銀一千六百兩外其餘皆應報部候撥此正部議所云撥解之款應照舊徵銀不能改議者也以工程言之近年應修各工概因經費短絀奉文停止卽閒有刻不可緩奏准辦理之工亦係爲數不多通年無幾或因本有息款始准支銷與其改用錢文仍不如加意撙節之爲有益也惟陝省留支項下有可以變通用錢之處如文武各官養廉公費並各屬額支夫馬工料及各關局額支收稅書役口食等款俱可搭放錢文查道光二十三年覆奏陝局減卯開鑄案內卽已議准凡養廉等項每領銀一兩內搭錢一百文抵作銀一錢每年共搭錢三萬六千四百三十三串三百六文共扣回庫銀三萬六千四百三十三兩三錢六釐按季報部現仍遵行無異是變通用錢之議陝省所辦已在他省之先其未經搭錢者現扣六分平頭計每年扣銀亦在一萬兩以上若再加搭錢文則減平一項轉覺扣不如數且卽使此等款內再令減銀添錢亦不過杯水車薪於大局似仍無濟至兵餉項下未便再搭錢文則前撫臣李星沅先已奏荷 恩俞自毋庸議當此權衡制用上厯 宵旰疇咨臣但有一得之愚斷不敢存苟安之見

惟就陝局情形細加體察實有難以改易者亦有業已變通者應請仍循舊章庶免轉生窒礙

陸見恭紀丁巳

吳廷棟

丙辰歲黃河潰決大名之開東長被水成災請賑奉 旨派 臣 廷棟稽查賑務仲冬蒙 恩升授山東藩司時

農部以大錢壅滯不行歸咎直省不肯疏通行使奏奉 諭旨飭下直督自明歲上忙爲始兼收三成錢三

成鈔票完納錢糧合省皆知勢不能行諸多窒礙因 諭旨嚴切有如不奉行私收實銀以枉法贓論之語督

臣不敢上陳懼干阻撓之罪合省人心皇皇迄無補救善策 廷棟於丁巳仲春 陛見直督因奉部文疏通大

錢之條陳於現行大錢二成奏明推廣行使三成臨歧諄屬 廷棟面奏情形 廷棟至京二十一日進見 上問

賑務及河決情形一一據實陳奏二十二日再進見 上即問直隸能否行使大錢對曰直隸市肆前曾出示

行使大錢二成今春復推廣行使三成小民謹奉公令原屬行使其實市中買賣價值百文之物因行使大錢

二成即索價百二十文今行使大錢三成即索價加三成暗中折算除去三成錢不計且不敢一言欺飾竊

謂此雖名爲行使實不得謂爲流通 國家立法必先便於民方可行必先信於民方能行現奉 諭旨直隸

自今歲上忙爲始錢糧即收三成錢三成鈔票是十成實銀已遞減去六成在百姓似宜歡忻鼓舞急於奉

行乃反懷疑觀望隱生顧慮者必有所不便不信也直隸計二百餘萬錢糧若收三成錢以京錢四串抵銀

一兩計收二百餘萬串大錢民間安能驟得如許大錢將來私鑄必由此充斥恐誅之不可勝誅如不收私鑄

則可指爲阻撓或折收制錢又干枉法姦民得以挾制其上矣倘謂既收大錢如部文所言京中必有商販自

然疏通將大錢由京運直竊謂商販所圖者利耳今以十文制錢買一當十大錢運至直省仍賣十文制錢初

無利息空增運費川資謂自多興販必無是理設有興販定是私鑄而影射官錢其弊何可勝言至各屬所收

大錢運交藩庫其運費又將何出臣駐開州以一州而論應收錢糧將及八萬以三成大錢而計合二萬四千兩以四串京錢抵銀一兩合九萬六千串每車運大錢六百串計車一百六十輛至省十一站每車四串一站計一車四十四串共需七千串有零此費取之民則爲浮收出自官必無力賠墊況由藩庫支放又需車費此亦窒礙難行之一端矣官民之情如此上忙錢糧恐難照常輸將直隸乃畿輔重地畿輔安靜足以拱衛京師前此所收銀七票三支放則銀票各半藩庫多此二成實銀方足以供周轉卽去歲大賑及今春展賑計用實銀十九萬有零皆賴此二成實銀撥發否則豈能鈔票大錢分給災民乎今年黃河決口未塞直隸水災必重若議賑卹費將何出又

東陵

差借資民力必先由藩庫墊發方不至緩不及事倘無款可撥必將預取於民操切太急恐抗糧抗差別滋事端必所不免外省情形各有不同在因地制宜酌量辦理督撫大臣受恩深重當此經費支絀之時如大錢可以疏通豈肯不盡心籌畫臣非謂大錢必不可行似宜以大錢爲母以制錢爲子必子母相權而子多於母方可漸次通行尤必禁令畫一不致朝更暮改庶足取信於民上始而靜聽繼則連聲相應曰據此無論官運商運仍是不行對曰若能行自然流通不待販運情事實是如此臣不敢一言欺飾各處行使大錢城內行使城外卽不能行使如何得謂流通今市中但見大錢不見制錢小民實是不便窮民日用零星之物僅值數文卽物價亦必有奇零市上只有當十大錢並無當一制錢豈非不便今百物騰踊實由於此蓋官以一錢爲當十民以當十爲一錢欲救此弊只有添鑄鐵制錢停鑄大錢以平其勢國家用鈔票大錢原爲每月搭放兵餉起見惟多搭換成制錢放散則多一成制錢自能平一成物價今戶工兩部不肯多鑄制錢臣曾訪問其故據云工本太費須兩文錢鑄一文似是物料工價底本太貴臣在直隸見寶直局所鑄鐵制錢雖無大盈餘不致如是之費國家錢法惟無餘利則私鑄不禁而自息其利權可操之自

上今市上不見制錢非是無制錢乃是市僧居奇銀一兩換大錢八串換制錢四串 朝廷多方疏通大錢立一法卽增一弊皆爲市商所假借以遂其操縱伸縮之計愈欲重大錢而大錢愈輕實由科條太多朝更夕改民無適從之故 國家先不自信何能取信於民前聞順天府出示不准挑剔大錢姦徒因故持破爛大錢買物有不收者卽勾通差役以阻撓大錢向其訛詐順天府查知前示生弊又出示准挑剔破爛大錢不用遂有借挑剔而不收大錢者民間遂訛傳不行使鐵大錢而鐵大錢竟廢而不用此禁令不一之一端也現在市上並不見有當十鐵大錢則民間不用可知乃戶工二部猶日鑄鐵大錢何也 國家設法疏通報捐則收鐵大錢二成今方平糶又全收鐵大錢將來大錢盡歸於官只有搭放兵餉一途兵持鐵大錢無處使用貧民小賈所得鐵大錢亦成棄物是兵民交困矣且御史條陳各持一說固有目擊時艱爲民生起見者恐或因 皇上意在疏通大錢揣摩迎合附和進言議論紛然徒足惑人聽聞亦所不免若因之多立章程流弊愈甚卽如銀票鈔票本係一例頒行乃無端自分輕重欲廢銀票而專用鈔票又准以銀票而換鈔票無怪銀票日輕也問曰直省物價已騰貴否對曰收三成大錢之贍黃初張物價實已漸長直省錢糧舊章似未可輕改或於三成銀票內有願交大錢者當聽其便其零星小戶銀不成兩者亦聽交大錢似不宜限定成數致有窒礙今歲上忙錢糧若不早定畫一章程必多觀望 臣竊謂三成大錢章程未免操之太急人見 諭旨嚴切懼干阻撓之罪勢既難行必至陽奉陰違諸弊叢生 皇上問及 臣臣實不敢一字欺朦 上頷之 臣廷棟退出嗣至朝房見大農翁協揆問及大錢可否流通謹以所奏對大農亦以爲然先是戶局日鑄大錢八成制錢二成卽因是易爲制錢八成大錢二成繼見少農沈公兆霖時管理錢法堂 廷棟亦進言如前少農稱快囑 廷棟具摺上陳 廷棟以現爲山東官 皇上問及故不敢不直陳究不敢出位具摺陳直隸事少農復親至寓諄切言之

廷棟謹謝謂可俟新任直督譚公廷襄奏止之廷棟復謁樞庭穆公蔭敏述奏對之言穆公亦擊節謂胸中鬱氣今爲一暢廷棟因問曰公旣以棟言爲然當日與農部會議時何不阻止公曰諸邸力持此議余力不能禁耳廷棟至東省後卽以所奏對寄書直省錢方伯忻和方伯亦深稱之謂制軍將蒞任可以奏明挽回後制軍陛見與諸邸會議遂得停止收三成大錢之議而民心始靖足徵時政之弊特患無人上達今聖主從善納言雖朝議意在必行之法但能明指其弊無不立即俯從而舉朝每以詔令已行遂譖爲不能補救何耶己未仲冬月臣吳廷棟追憶恭紀

平定州專用鐵錢流弊議

黃輔辰

晉省平定州設立戶部寶泉分局原係移鑄就鐵鑄錢運京以濟銅錢之乏繼因錢質過低復令就地行銷除工本外將每歲餘息解部咸豐七年據分局咨稱每年鑄錢十九萬餘串平定一州難於行銷請各府州縣一律行使鐵錢不分成數當體察輿情礙難更變咨部在案本年添設三鑄錢愈增十月間平定紳民呈請漸次搭用銅制錢由院批飭在案而分局部員總以阻遏爲辭查晉省鐵錢難於暢行實因各鎮集銅幣尙敷周轉民間行使不願更張咸豐五年奉准部咨行令搭放鐵錢當經王撫憲率屬捐資於省城試鑄鐵錢復經分局陸續解到鐵制錢二萬串由省城試行搭放一成當時民間雖無阻撓而行使究多勉強至省城數十里外商民仍不收用是以分局解到之鐵錢一年有餘始能放完而省城試鑄之鐵錢則始終未能搭放若布爲號令以數十萬鐵錢向各州縣市易必至高擡銀價誤貽錢糧正供此晉省鐵錢礙難通行曾經咨部之情形也嗣後平定壽陽盂縣等處因鐵錢時價較銅錢甚賤商民惑於小利凡以銀易錢者均取鐵而棄銅奸商更將銅錢藏匿凡客商過往有易銅錢者得借此以居奇因是銅錢日少鐵錢日增而銀價日貴矣據分局前咨每

歲鑄鐵錢十九萬餘串之多即使此外無分文私鑄行銷已屬不易况復增鑄鼓鑄有加無已直豫兩省以爲平定鐵錢暢行紛紛載運入境鐵錢愈多而愈滯銀銅遂日少而日昂小民逐末所得鐵錢不足償本則百物騰貴貧民無以聊生必然之勢也查從前試行鐵錢原未禁用銅錢現以銀價日昂民閒仍請銅鐵並行不過欲借銅錢以減銀價并非棄鐵錢而不用實因專用鐵錢則無從得錢而生計日蹙此又民閒呈請銅錢並用之實在情形也查分局所重惟在餘息易銀計每歲解部從前不過三萬餘兩而鑄錢則無有限制將欲行布於通省則征收錢糧必至鐵多銅少難於易銀批解近年以來平定州徵解錢糧諸多窒礙固分局所目睹晉省錢糧爲數甚鉅奉撥京協各餉全賴丁糧接濟稍有遲滯貽誤匪輕以數萬兩之餘息致礙數百萬之正供利害相懸固屬不值若止平定行使則一州之用銀有限而分局之鑄錢無窮銀竭害生卽欲嚴法重刑勉強行使其勢有所不能在分局之意以爲不費帑金坐獲餘息豈知利害相因利所在則衆爭趨之害將至則衆爭避之爭趨之而利固難久爭避之而害更可虞且平定轄境皆在萬山之中平時稽查巡防已屬不易自設鑄以後匠作夫役并挖鐵運鐵及外來趁利各項人等日聚日多難免匪徒混迹其閒久則易聚難散是歲出之利甚微而流貽之害甚大此更不可不慮也

銀幣論一

馬敬之

天下之大害曰飢寒天下之大利曰菽粟曰布帛菽粟極圭撮布帛極分寸權之以錢幣交易始鬯銀幣者權錢幣者也利宜與錢分行明中葉國賦頽微銀迄本朝銀幣遂盛乾隆嘉慶間隩區廣郡婚喪之酬飲賓友之惠貽匪錢幣意若噍天下之幣乃壹出於銀乃以錢權銀今置數者其前銀所欲也錢所欲也菽粟布帛所欲也然菽粟布帛提挈蹇頓卽以今制錢準之緡若重七觔一人所勝率二十緡而止或數百緡數千緡則非

舟車運般末由致遠奔走天下惟銀幣乎銀幣生錢幣病菽粟布帛死貲累鉅億緘束局鑄囊橐篋焉便官吏便商賈便盜賊官吏商賈盜賊便吾農吾氓彌甚不便今夫不便而輾轉而已得銀猶可說也抗冶之設向兼采銀厥今永行禁閉市舶之集向資來銀厥今反虞透漏禁閉嚴銀源絕透漏多銀流決而又釵釧銷鑄去其一杯箸鏤嵌去其一椎箔研泥及雜物塗毀去其一是故銀幣耗農夫織婦畢歲勤動低估以售之所得之錢不可輸賦更進而權銀近日鄉中并未聞以銀羅買者日復一日錢并壅於商賈不能得銀且不能得錢金之用珍於銀天下不憂金之耗者國家制幣在銀不在金也錢之用浩於銀天下不計錢之耗者鼓鑄未停抑供億所亟在銀不在錢也譬諸身菽粟布帛心膂也錢血脈也銀指爪毛髮也譬諸家菽粟布帛父母也錢子弟也銀傭隸婢妾也先指爪毛髮傭隸婢妾而後血脈子弟吾見心膂之壅鬱父母之軒囂而已矣以錢權銀菽粟布帛益賤銀益難得天下之人駸駸乎背棄閭井驚爲商賈必至愚至劣者自念孱懦姑隱忍緣隴而旬圍廬而氣固囂然其不靖官吏則貪冒橫城府盜賊則攘奪橫江湖遲之數十年恐釋未而倚市投杼而刺文者尙良民焉耳易曰物窮則變變則通通則久又曰節以制度不傷財不害民處極敝之時而不思變通之術節制之經坐令上虧帑藏下毒黔黎有志之士所欲搯擊而抵掌也宋熙甯中張方平疏言比年公私交困并苦乏錢農民皆變轉穀帛輸納見錢錢既難得穀帛益賤人情窘迫謂之錢荒方今天下豈不謂之銀荒者與

銀幣論二

馬敬之

救銀幣之耗不在不用銀幣也天之所施地之所生凡濟於用英君蒞相方將輟胥肝創起宣導之矧乃銀幣天下不廢銀幣斷斷矣譚者顧踵沼輒云古未嘗以銀爲幣魏源氏近之達者也其軍儲篇亦云宋明以前銀不爲幣此惟漢書食貨志稱秦并天下幣爲二等而珠玉龜貝銀錫之屬爲器飾不爲幣爾太皞始鑄金禹湯

鑄歷山莊山之金不必其銀不必其非銀矣荆揚貢金三品梁州銀鐵并貢爾雅白金謂之銀其美者謂之鏐不必其幣不必其非幣矣漢武帝元狩四年造白金及皮幣少府多銀錫又造銀錫白金其後官鑄赤爪白金稍賤民弗寶用貢禹上諫宜罷采珠玉金銀鑄錢之官亡復以爲幣王莽卽真溺信圖讖忌劉金刀乃罷錯刀契刀五銖錢更作金銀龜貝錢布之品名曰寶貨其銀貨二品則朱提入兩爲一流直一千五百八十他銀一流直千晉武帝保定元年河西諸郡或用西域金銀之錢如今天錢通典梁初交廣之域全以金銀爲貨幣韓愈奏五嶺買賣一以銀元稹奏狀自嶺以南以金銀爲貨幣雖遐陬僻壤兼之市舶銀未通行固爲幣矣源又曰銀鑛開采唐以前史書從無其事而下篇引周禮卅人掌金玉錫石之地而爲之厲禁以守之若以時取之則物其地圖而授之巡其禁令謂冶坑開閉禁令之始庸當時獨遺銀邪後魏宣武延昌三年有司奏長安驪山有銀鑛二石得銀七兩其秋恆州上言白登山有銀鑛入石得銀七兩錫三百餘觔其色潔白有逾上品詔并罷常令采鑄云從無其事何邪貞觀初侍御史權萬紀上言宣饒二州銀大發采之歲可得數百萬緡帝以崑言稅銀之利黜萬紀一時斂意千古經制乎哉道不變者也法世變者也變法以牟利害卽階變法以斥利害卽詐錢子也菽粟布帛母也母可權子子可權母例錢於銀銀子而錢母錢幣不可權銀幣錢幣權銀幣錢幣菽粟布帛菽輕管商把牢盆蕭留典會計不能使裕矣而況材管鑰量斗筭詰以大計弱哂強罵一二畸儒碩士罔顧事勢之宜與否矯枉偏持務伸己說徑行其說其不毒天下也幾希畢初所聞可以關其口而奪之氣也

用銀利弊論

姚文枬

古之爲市者以其所有易其所無皆粟與器械而已上之取於民亦粟米布縷而已至不得已而後以錢權之

而又未嘗專用錢也降及後世泉貨交易因時遞變而日趨於難至今日之用銀而極矣蓋管論之銀之爲用行之一方則可以之通行天下則不可行之一時則可行之以爲久遠之計則不可聽民之自爲交易則猶可征收支給上下通行則大不可何言之唐時嶺南買賣一以銀見韓愈元稹奏狀通典亦載梁初交廣之域全以金銀爲貨蓋地瀕南海坑冶多而海舶利也宋仁宗時詔諸路歲輸緡錢福建一廣易以銀蓋亦因之此則行之一方有餘而無不足者也夏有水患禹發歷山之金作幣以救民商有旱災湯發莊山之金作幣以救民此行之一時有利而無弊者也自元以來銀竟通行寢不可救至明初禁用甚嚴乃未幾而通行如故漸至賦稅俸工無一不銀積重之勢極矣當時議者極陳用銀之便行之既久吏民亦尙相安然而征收支給上下通用行之天下垂之久遠愚終以爲大不可者何也夫人心風俗國家之元氣也食貨者天下之元氣而國與民之所賴也銀既通行則銀貴而粟賤粟賤而田輕於是天下皆棄本而逐末夫務本則安於樸厚逐末則習爲黠詐其勢然也民務本則田野日闢食貨自饒而人皆飽煖民逐末則田多拋荒食貨日絀而人受飢寒又其勢然也黠詐之甚流爲姦惡飢寒之極歸於盜賊而銀者輕而易鬻又適足以便奸惡之侵欺而使盜賊有所勸於是循環相生世變日增而靡所底止天下之元氣日耗一日此其不可者一也古者民有恆產朝廷制之故天下之利權皆歸於上後世井田既廢寢不可問然錢之行也猶足以權食貨之輕重至上下通行一皆以銀則粟帛賤而民困制錢滯而國困獨所謂黠詐之民逐末致富起而爲豪商巨賈者稱貸則重利剝民居奇則厚貲積滯銀錢輕重之權出其操縱官民拱手而聽之夫朝野交困而豪猾擅其利已不可言朝野交困而豪猾擅其權尙可言乎此其不可者二也銀之出也非由於滇之各廠卽來自番舶然銀廠之設不耕而食者約有十萬餘人漢貢禹所謂一歲受飢且七十萬人者昔人指爲根本切實之論銀廠之置何以異此且近廠

之地食貨必貴盜賊必多又煎煉之爐煙蒸黃菽豆洗礮之溪水損削田苗至若供億一切尤種種難罄是資於課者無多而害於民者實甚非計之得者也若專恃番舶則棄國中本有之貨而轉仰給於外番常變既不可知漏卮已所難塞抑尤謀國者之所宜深念者矣此其不可者三也銀者飢不可食寒不可衣平時視爲至寶設遇干戈水旱而粟帛無可得易銀亦廢物而已故征給用銀無論逋賦愈多度支愈絀也卽能府庫充盈亦非至計前明正統間以官倉儲積有餘令所在出積滯變輕齎乃自折銀之後不三四年水旱頻仍設法勸借至千石以上以賑凶荒者謂之義民詔復其家然空虛已見而相沿用銀仍未議改既而郡國大祲倉無見粟民思從亂國隨以亡豈非百世之鑒歟此其不可者四也夫合此四者言之則是銀之通行授權豪猾日耗元氣於不知且所出之途隘而積之府庫又緩急不足恃然而數百年來征收支給上下通行用之天下垂之久遠而未嘗廢然返者何也曰用銀則軍民省輓運之勞倉庾免紅朽之患其爲利也顯而四不可者害雖中於本原其爲害也隱顯者其利淺隱者其害深庸人見其顯不見其隱見其淺不見其深是以數百年來官民受困數倍於前而不知其由於用銀也卽有一二見及者又畏難苟安一誤再誤可勝歎乎夫物極則變變則通用銀至今日可謂極矣前此竟未議改或者變通之舉將留以有待於今日誠能詳考昔人之言赫然改法征收支給概不用銀使制錢流通食貨饒裕俾天下後世知盛朝之所爲超出尋常萬萬也豈不盛哉

請派大員查辦疏 光緒六年

張楷

本年十月二十五日奉 上諭此次戶部盤查寶泉局庫當十大錢有無虧短是否未將制錢盤查著戶部據實覆奏欽此十一月初四日戶部覆奏奉 旨將同治九年後歷任各該監督大使分別議處等因欽此及見該部原摺所 奏盤查當十大錢尙爲明晰至所 奏宙宇庫制錢未能盤查情形則避罪諉過含混模稜尙

多不實不盡之處如原奏云錢質輕小不如式夫式由部定豈有本部鑄錢而不如式者既不如式何以歷任監督交代時絕不驗明是非於停止盤查後陸續抽換斷不至此又云字樣模糊重六七分不等查係咸豐七年以前所鑄夫字樣模糊僅可以備數者私錢也豈有煌煌泉府預藏私錢之理此中情弊不問可知且字樣既已模糊矣安知非七年之後以私鑄而必斷爲七年以前之官鑄耶其抽換與否部臣何無一言及之至云此次奏借經費二千兩費用過半若全數穿出費用仍多不敷等語則愈不然夫錢質輕小不適於用一見了然不待穿出六萬餘串而後知也乃約略其詞謂大數不甚懸殊豈果爲經費起見乎抑別有難言者乎在部臣以事隔多年無從深究而不知關係大局非淺鮮也 帑項係該部職守此錢既不可用自當卽時舉發究詰其所由來而原奏乃云不值以可節之費盤無用之錢徐圖設法變通辦理若爲不甚愛惜也者是未經盤查以前該典守者憚其發覺尙思彌補既經盤查以後竟以無用入 告該典守者直可置身事外矣此風一倡異日銀庫中設有一鉛錫抽換者亦將謬爲某年以前所收援此例以邀免追究耶各直省庫款設有如此類者亦將不之問耶是棄此項制錢事猶小而將來虧空 國帑不可究詰貽誤事機患更大也竊惟今日事勢其所最棘手者莫如餉糈而餉糈之盈絀自戶部始戶部之綜核自庫儲始當此 帑項奇絀積弊至於如是猶復支吾避就何以專責成而警慢藏相應請 旨另派大臣認真嚴查有無抽換情弊再行辦理庶政體益肅流弊可除矣

請將年終應解物料變通辦理疏 光緒九年

山西巡撫張之洞

竊惟晉省額解之物其大端有五曰鐵曰綢曰絹曰紙曰礦每年例解平錢一批共八萬四百九十八斤好鐵四批共一千萬斤大潞綢一批共三十疋小潞綢一批共五十疋農桑絹一批共三百疋生紫絹四批共一千

二百疋遇閏加四十疋呈文紙一批共四萬張毛頭紙一批共一萬張硫磺一批共十萬斤各項物價運脚例皆動支地丁然價脚之不敷者數倍例款有限各官攤捐不敷行戶幫貼騷然煩費官民苦之臣於上年六月具疏懇陳晉省苦累情形請免攤捐並請將平好鐵一項議給津貼均蒙 恩旨允准在案至綢絹紙三項前

請折價解部經戶部工部內務府議覆仍令照舊造辦並准工部迭次催解硫磺前來查以上各宗物料在物

產豐盈之時價廉之省尙以勞費無度以致累年均有積欠大祿以後官吏工商無不大困欠解愈多自

臣抵

省極力經營籌款設專局選擇廉幹之員釐剔弊端盡除冗費甘爲怨府力任其難計自上年正月至本年十

一月共籌解平鐵二批好鐵十六批大潞綢二批小潞綢二批農桑絹二批生素絹八批呈文紙二批毛頭紙

三批硫磺三批除臣任內兩年所解已足兩年之數外並爲補解鐵磺紙十批論晉之物力實已竭盡無餘通

計從前積欠截至光緒九年除戶部議免光緒三四五等年平好鐵十五批外尙有未解平鐵一批好鐵四十

四批大潞綢四批小潞綢四批農桑絹十一批生素絹三十二批呈文紙六批毛頭紙十三批硫磺三批就此

次欠數合而計之例價例脚之應動地丁者共需銀十萬六千六百餘兩幫價幫脚之應出攤捐者共需銀三

十萬七千六百餘兩若必一一補解不惟攤捐已裁幫費無從取辦卽例應正動地丁之款爲數已逾十萬庫

儲未免太傷伏思以上數端但使年額無虧自可不闕於用而各物又皆由庫款購辦而來非如官民逋欠錢

糧多追一分於帑藏有一分之益今當度支匱乏之秋若耗損重金以求府庫充裕積此纍纍不急之需輾轉

轉輸致此陳陳相因之物似爲非計况攤捐所有自來自府州縣以至佐雜無不有之查欠此攤捐者遠近二

十年外大小五百餘員或已物故或已參劾或已離省在晉者十不存一凡欠解攤款於例不能參追卽使追

呼亦終無濟至於工少商疲行戶乏絕更不待言如此時而欲追集此三十萬之攤款竊恐難以劉晏之才商

缺之法必亦有所不能徒令官民愁嘆文牘煩滋亦非所以修吏治而存政體也 臣審度時勢綜核盈虛惟畫分新陳區別緩急查潞紬爲 典禮之用硫磺乃軍實所資無論晉省如何竭蹶亦必新陳並辦擬自光緒十年爲始每年辦解本年大小潞紬硫磺各一批並搭解舊欠各一批至鐵絹紙三項質既重滯數更浩繁質重則轉運艱數繁則工費大正款既鉅攤幫尤多今方仰沐 聖慈埽除積弊官民交慶喘息稍舒若此三項亦責以新陳並辦舊攤現不能追收新攤又不便科派如此鉅款籌措何從且歷來部檄敦催責舊則移新責新則遺舊以致貽此鉅累牽搭拖延永無廓清之日此等辦法原可掩飾一時但事理既有所不可微 臣愚拙之性亦有所不爲不得不瀝誠呼籲量請裁免合無仰懇 天恩俯念晉省彫敝之區公私交困准將同治三年分起至光緒八年分止欠解各批平鐵好鐵農桑絹生素絹呈文紙毛頭紙概予免解俾 臣得以專力於額運年清年款斷不至再有所虧即按年認解之潞紬硫磺新陳各一批亦可兼籌無誤庶幾庫儲既節額運亦清官累既舒民困亦減種種皆有裨益出自 逾格鴻慈

請將晉省例解綢絹紙張折價解部片

光緒八年

張之洞

晉省常年例解大小潞紬八十疋生素絹一千二百疋毛頭紙一百萬張呈文紙四萬張上項諸色爲物甚菲而累及官民甚重所役馱載甚多潞紬並不出於潞安潞民但能養蠶不習機杼向在澤州織辦或雇澤匠到潞織辦或寄絛至豫省織辦大稅以後桑植不蕃機匠寥落如澤州機戶前約千有餘家五年前三十餘家今存米山鎮劉氏一家此不惟災餘之衰亦足見地利之遷移餘則外郡解絛供匠省城織造近年欠絛甚多解匠者十一州縣今有九州縣皆報故絕招募無人通計絛價織工運脚雜費解絹一疋費銀十兩紙戶向以承應官差爲行頭胥吏所擾而蒲州紙戶流亡失業尤爲困苦屢次呈訴求免綜計綢浮于例價五倍絹紙浮于

例價十倍又各項價脚不敷攤之通省一縣不齊則全批停運臣到任後多方督催甫於四月內各解一批綢解至光緒四年止絹紙解至光緒元年止此就解多者言之其餘各府積欠尙在十年以上查晉省土性疆廩產絲棉緞水色沈闇練染無方織爲衣料不惟非江浙四川紬緞之比亦遠不如南陽鄖陽之繭緞僅與雲南所產相等並無足貴若生素農桑等絹質地尤爲疏薄略似京師羅底稀紗至毛頭呈文等紙裏粗色黯卽京師市肆通行之皮紙而潔白遜之竊考山西地產他無可稱惟煤鐵兩端利於民用其出最蕃而其質最良甲於他方鐵之爲物既爲農器家人日用海疆機局之所必資而平日本爲薊遼兗豫江浙以南商賈轉販之所及所宜講求推廣招徠工商以爲足國富民之計故平好鐵一端臣此次疏中但懇津貼不請折納以其非他省所產之可敵故也若夫隨地皆有之物又不精良宜無關於任土作貢之義但使可以備用似不必輸之遠方按綢緞紙張皆以江南所產爲勝近年華商輪船暢行江海絲貨紙貨充物津沽達于輦下由其轉輸輕利故物美而價廉都市之中何求不得卽如毛頭紙一百萬張呈文紙四萬張合計包裹繩索箱篋氈席解役行李共重三四萬斤晉地山路艱難任載有限用大車五十餘輛用驢贏則須三四百頭再加以他項綢絹勞民重役抑又可知全省之中騷然煩費而遲致此粗重之物此固因時制宜之制道所當斟酌者也合無仰懇天恩俯念晉省積累物微遲艱量予變通可否將此項綢絹紙張折支價例脚解部此外再由晉省籌款按照例價例脚解部現已行減實銀之數津貼銀二千七百一十四兩零一分三釐並舊章部飯一併附京餉之便搭解戶工兩部就近採買應用如此一轉移間內府曹司不闕需用不煩催迫而晉省承辦之民戶攤捐之州縣委解之佐雜微員均免賠累之苦共戴皇仁實無涯涘伏查潞綢一項乾隆中葉以前額解大綢一百疋小綢三百疋乾隆三十四年減爲今之數旋又復舊嘉慶十一年工部奏准停止至嘉慶十五年始又飭令